

Headlines

1. राजौरी दी ऐतिहासिक भैरव जात्तरा गी आधिकारिक तौर पर भारत दी राष्ट्र अमूर्त सांस्कृतिक धरोहर दी सूची च शामिल कीता गेआ। उपराज्यपाल मनोज सिन्हा होरें जिला प्रशासन ते संस्कृति मैहकमे गी मुबारकबाद दिती।
2. उपराज्यपाल होरें भगवती नगर जात्री निवास जम्मू दा दौरा लाया ते श्रद्धालुएं गी दिती जा'रदी स्थूलतें दा जायजा लैता।
3. सुरक्षाबलें पुंछ जिले च आतंकवादिएं दी छप्पने आहली इक थाहर दा पता लाइयै असला बरूद बरामद कीता।
4. डी.जी सी.आई.एस.एफ होरें जम्मू च श्री अमरनाथ जी दी जात्तरा दी तैयारिएं दा जायजा लैता।
5. रियासी जिला प्रशासन नै चिनाव दे पानी दा स्तर पन बिजली परियोजनाएं आहली थाह थमां गार कडुने आहली प्रक्रिया दरान बदने बारै परामर्श जारी कीता।

<><><><><><>

LG-Bhairav

उपराज्यपाल मनोज सिन्हा होरें राजौरी जिला प्रशासन ते जम्मू-कश्मीर दे संस्कृति विभाग गी भारत दी अमूर्त सांस्कृतिक विरासत दी राष्ट्री सूची च ऐतिहासिक भैरव जात्तरा गी शामिल कीते जाने पर बधाई दिती ऐ। इसी राजौरी लेई बड़ी मानै आहली गल्ल दस्सदे होई एल.जी होरें आखेआ जे एहू मान्यता क्षेत्र दी आध्यात्मिक ते सांस्कृतिक जड़ें गी होर मजबूत करोग। उनें आखेआ जे एहू राष्ट्री सम्मान उनें पीढ़ियें दे भक्तें दे यत्नें गी मान्यता दिंदा ऐ जिनें सदियें थमां इस विरासत गी जींदा रक्खेआ। उपराज्यपाल होरें आखेआ जे भैरव जात्तरा दा इस सांस्कृतिक विरासत च शामिल होने करी राष्ट्री स्तर पर राजौरी दी सगोसार संस्कृति दी पंछान होर निगार होई जाहग।

<><><><><><>

LG-Yatri Niwas Visit

उपराज्यपाल मनोज सिन्हा होरें अज्ज जम्मू दे भगवती नगर यात्री निवास दौरा लाया ते श्री अमरनाथ जात्तरा पर जाने आहले यात्रुएं गी दित्ती जा'रदियें सुविधाएं दा जायजा लैता। उनें आखेआ जे छड़े 12 दिनें च गै जात्रुएं दी गिनतरी 3 लक्ख शा अगगे बधी गेदी ऐ। उपराज्यपाल होरें आखेआ जे श्रद्धालुएं लेई सुरक्षित ते बिजन कुसा परेशानी दी जात्तरा गी यकीनी बनाना प्रशासन दी प्राथमिकता ऐ। जम्मू-कश्मीर पुलस, सेना, सुरक्षाबलें श्री अमरनाथ जी श्राइन बोर्ड ते सिविल प्रशासन दे अधिकारिएं कन्नै लग्गी दी जायजा मीटिंग दरान एल.जी होरें उंदे आसेआ कीते जा'रदे कम्में दी सराहना कीती ते हर इक जात्रु गी विशेष परौहना समझने दा आग्रह कीता।

<><><><><><>

Hodeout

सुरक्षाबलें इक बड्डी सफलता हासल करदे होई जंदे मंगलवारें राती पुंछ दे सब्जियां जंगलें च चलाए गेदे इक तपाशी अभियान दरान आतंकियें दे छुप्पने दे ठिकाने गी तबाह करी दित्ता। इस दरान उत्थुआं भारी मात्रा च गोला-बरूद बी बरामद होआ। आकाशवाणी जम्मू संवाददाता दी रिपोर्ट मूजब साब्जियां जंगलें च एस.ओ.जी दे नेतृत्व च चलाए गेदे संयुक्त अभियान च पीका मशीन गन दे 246 जींदा कारतूस बरामद कीते गे। इक विशेष सूह थोने मगरा जम्मू-कश्मीर पुलस दे एसओजी ते सुरक्षाबलें इक सांझे अभियान च साब्जियां जंगलें च तपाशी अभियान शुरू कीता हा।

<><><><><><>

JU-Book

जम्मू यूनिवर्सिटी नै विवादित किताब personalities and legends of J&K दे लखारियें पर प्रतिबंध लाई दित्ता ऐ ते प्रकाशकें गी ब्लैक लिस्टिड करी दित्ता ऐ ते सबनें विभागें गी निर्देश जारी कीते न जे सबनें लाइब्रेरियें ते डिजिटल संग्रहें थमां सारी सामग्री फौरी तौरा पर हटाई दित्ती जा। इक अधिकारिक सर्कुलर मूजब एहू फैसला शिक्षा विभाग आसेआ जारी सरकारी आदेश दी पालमा च लैता गेआ ऐ जेदे च सूचीबद्ध लेखकें ते प्रकाशकें उप्पर रोक लाई दित्ती गेई ऐ। प्रतिबंध लेखकें च हिलाल अहमद, संतोश मीना ते डा. सुशांत गिरी ते प्रकाशकें च ओबराय बुक सर्विस जम्मू ते अनुराग प्रकाशन दिल्ली दा नांS शामिल ऐ।

Shikshak Sahayak

रामबन दा शिक्षा विभाग शिक्षक सहायक चैटवाट उप्पर ध्यान केंद्रित करा'रदा ऐ जेड़ा शिक्षकें लेई डिजिटल पाठ योजनाएं, वर्कशीटें ते होर दुए लोड़चदे उपकरणें तगर पुज्जत बनाने लेई तैयार कीता गेदा इक विशेष ए.आई सहायक ऐ। शिक्षण च मदाद लेई इसी स्कूली शिक्षा विभाग दे तैहत विद्या समीक्षा केंद्र वी.एस.के च एकीकृत कीता गेआ ऐ। एहू शिक्षा दे क्षेत्र च संचालन, पारदर्शिता ते योग्यता च सुधार लेई वी.एस.के मंच दे राएं अमल च लोआंदी जा'रदी ऐ।

<><><><><><>

DG-CISF

CISF देडी.जी पी रंजन होरें अपने जम्मू दौरे दरान चला'रदी श्री अमरनाथ जी दी जात्तरा लेई कीते गेदे सुरक्षा इंतजामें दा जायजा लैता। आकाशवाणी जम्मू संवाददाता दी रिपोर्ट मूजब रंजन होरें केंद्री सशस्त्र पुलस बल, जम्मू-कश्मीर पुलस, सेना ते होर दुई एजेंसिएं दे उच्च अधिकारिएं दी बैठक लाइयै सुरक्षा बंदोबस्तें दा जायजा लैता। सी.आई.एस.एफ दे वरिष्ठ अफसरें कन्नै उनें सुरक्षा सरबन्धी हीलें दा जायजा लैता। डी.जी होरें भगवती नगर आहले आधार शिविर, सांझे पुलस नियंत्रण कक्ष, सी.सी.टी.वी कंट्रोल रूम ते तवी रीवर फ्रंट दा दौरा लाया ते सुरक्षा बवस्था दा निरीक्षण कीता।

<><><><><><>

Reasi-Chanab Advisory

जिला प्रशासन रियासी आसेआ 16 ते 26 जुलाई गी चनाब दरेआ च पानी दा स्तर बदने बारै आम लोकें लेई इक परामर्श जारी कीता ऐ। एहू परामर्श सलाल ते बगलिहार पन बिजली परियोजनाएं आहली थाहें थमां गार कडुने दे चलदे जारी कीता गेआ ऐ। प्रशासन नै चनाव दरेआ कश रवा'रदे बसनीकें ते आम लोकें गी इस अवधि दरान सौहगा ते सतर्क रौहने लेई आखेआ ऐ। लोकें गी आखेआ गेआ ऐ जे ओहू दरेआ दे कंडे कश नेई जान कीजे पानी दा स्तर तेजी कन्नै बदी सकदा ऐ जेदे करी जान-माल दा नुकसान होई सकदा ऐ।

Weather

मौसम विभाग नै अज्जै कोला लेइयै 17 जुलाई तगर जम्मू-कश्मीर दे बक्ख-बक्ख हिस्से च गर्मी ते गुम्मे दे कन्नो-कन्नो बिच्च-बिच्च किश समें लेई हलकी बरखा दी पेशनगोई कीती ऐ। जारी जानकारी मुजब 18 कोला 20 जुलाई दे दौरान केन्द्र शासत प्रदेश दे मते सारे हिस्से च गर्ज चमक कन्नै बरखा बरने दे असार दस्से गेदे न। इस दरान संवेदनशील इलाके च चानचक्क हाड़ औने ते पस्सियां पौने दी बी चेतावनी दिती ऐ। लोकें गी सलाह दिती गेई ऐ कि ओ भारी बरखा ते दौरान मते सौहगे-सतर्क रौहन।

<><><><><><>

Adv. Announcement

आकाशवाणी जम्मू दे प्रादेशिक समाचार एकांश ने प्हाड़ी भाशा लेई कैजुअल न्यूजरीडर-कम-ट्रांसलेटर ते स्टेनोग्राफर दे पैनल च शामिल होने लेई जम्मू-कश्मीर दे रौहने आहले 21 शा 50 बरें धोड़ी दी उम्री दे इच्छुक मेदवारें कोला दरखवास्तां मंगियां न।

कैजुअल न्यूजरीडर-कम-ट्रांसलेटर लेई घट्टोघट्ट योग्यता कुसै मान्यता हासल यूनिवर्सिटी थमां ग्रेजुएशन ते प्हाड़ी भाशा दी शैल जानकारी दा होना ऐ। न्यूजरीडर लेई (प्रसारण लेई मुआफक) खरी अवाज दा बी होना जरूरी ऐ।

स्टेनोग्राफर लेई, घट्टोघट्ट योग्यता कुसै मान्यता हासल एजुकेशन बोर्ड थमां 12मीं पास होना ते प्हाड़ी भाशा च खरी जानकारी दा होना ऐ। कन्नै गै, कम्प्यूटर पर प्हाड़ी भाशा च टाइपिंग दी स्पीड 25 कोला 40 लफ़्ज़ फी मिनट होनी लोड़चदी ऐ।

आवेदन दी हार्ड कॉपी 'हेड ऑफ न्यूज, रीजनल न्यूज यूनिट, आकाशवाणी, पंजतीर्थी जम्मू पिनकोड-180001' दे दफ्तरै च (दस्ती) जमा करोआनी होग। एह्दे कन्नै सबबै जरूरी दस्तावेज ते आवेदन शुल्क बी होना चाहिदा (जेहड़ा वापस नेई होग)। सामान्य श्रेणी दे मेदवारें लेई एह् शुल्क 355 रपे ते एस.सी/एस.टी/ओ.बी.सी मेदवारें लेई 265 रपे (18 फीसद जी.एस.टी सने) ऐ।

एह् शुल्क प्रसार भारती, आकाशवाणी, जम्मू दे बैंक खाता नंबर 10582387126(एस.बी.आई मेन ब्रांच, हरि मार्केट, जम्मू) च ऑनलाइन जमा कीता जाई सकदा ऐ। आई.एफ.एस.सी

कोड: SBIN0000657 ऐ। शुल्क जमा करने दे बाद मिले दे स्क्रीनशॉट दा प्रिंटआउट जां ऑनलाइन पेमेंट/ट्रांजैक्शन आई.डी, आवेदन दे कन्नै जरूर होनी लोड़चदी। आवेदन करने दी खीरी तरीक 19 जुलाई 2026 (ऐतवार) ऐ। मती जानकारी टेलीफोन नंबर 0191-2546658 ते 9697177241 पर लैती जाई सकदी ऐ। तफ्सीली इश्तेहार ते आवेदन फॉर्म साढ़ी वेबसाइट www.newsonair.gov.in पर होमपेज दे अखीरै च 'Vacancies' आइकन पर उपलब्ध ऐ।

<><><><><><>